

\*\*\*\*\*

یوہ آکا شوانی جموں ہے محمد آصف لو دھی تے عبدالرحمن شاہین تیں خبر سُنو۔ پہلاں خاص خاص خبر۔

\*\*\*\*\*

- \*1۔ جموں کشمیر قانون ساز اسمبلی نے اج خصوصی درجہ نانہ بحال کرن غی خاطر اک قرار داد پاس کی ہے۔
- \*2۔ بھارتی فوج نے مُلک نانہ خود انحصاری در لے جان واسطے پہل نانہ تقویت بخشاں وان شمالی کمانڈ مانہ 550 اے ایس ایم آئی مشین پستول شامل کی ہیں۔
- \*3۔ نیٹی آہوگ غی طرفوں پانی غا رکھ رکھاؤ واسطے بیداری و خاصیت پیدا کرن آلا 15 روزہ پروگرام شروع کرایو گیو ہے۔
- \*4۔ امریکہ غا صدارتی انتخابات مانہ ریپبلکن اُمید وار ڈونالڈ ٹرمپ جیت درج کرن غے نیڑے پُچ گیا ہیں وزیر اعظم نریندر مودی نے اُن غی انتخابی جت ور مبادی رکباد پیش کی ہے۔
- \*5۔ جموں کشمیر حکومت غی طرفوں ملازمین غی ای پی ایم ور جولائی تیں ستمبر آلی سہ ماہی خود جائزہ رپورٹ پھرن غی آخری تاریخ بدھا دتی گئی ہے۔

\*\*\*\*\*

خبراں غی تفصیل نال پہلاں عبدالرحمن شاہین۔

#### JK Assembly

جموں کشمیر حکومت نے اج جموں کشمیر غو خصوصی درجو بحال کرن غی خاطر ایوان مانہ اک قرار داد منظور کی ہے۔ واضع رہے۔ اج سویرے جیسی ہی ایوان غی کا روائی شروع ہوئی تاں جموں کشمیر غا نائب وزیر اعلیٰ سریندر کمار چودھری نے جموں کشمیر نانہ خصوصی درجو فراہم کرن بارے ایوان مانہ قرار داد پیش کی۔ جس مانہ واضع کیو گیو ہے۔ جسے خصوصی درجو مہا را حقوق غی راکھی کرے۔ ایوان مانہ قرار داد پیش کرتاں وان جموں کشمیر حکومت نے مرکزی سرکار تیں مانگ کی ہے جسے جموں کشمیر غا چُنیا گیا عوامی نمائندان نال گل بات شروع کر غے مہا را خصوصی درجہ نانہ بحال کیو جائے۔ واضع رہے۔ اج سویرے جیسی ہی ایوان مانہ قرار داد پیش کی تاں اس غے خلاف حزب اختلاف غی جماعت بی جے پی گامبراں نے سُنیل شرما غی قیادت مانہ قرار داد غے خلاف شور شرابو شروع کرتاں وان کہیو ہے اس ویلے اس نانہ لیانو اسمبلی غا کم کاج غو حصو نہیں ہے۔ نعرے بازی غے دوران ہی اسمبلی غا سپیکر عبدالرحیم راتھر نے ایوان مانہ زبانی ووٹ غے ذریعے اس نانہ پاس کر دتو۔ جس تیں بعد سپیکر نے پورا دن واسطے ایوان غی کا روائی نانہ ملتوی کر دتو۔ واضع رہے جسے جموں کشمیر نانہ خصوصی درجو فراہم کران آلی آئین غی دفعہ 370 نانہ مُلک غی پارلیمنٹ 5 اگست 2019 نانہ ہٹا دتو تھو۔

\*\*\*\*\*

#### Army ASMI

مُلک نانہ اپنا وسائل ور انحصار کرن گامقصد نال طاقتور بنان غا سلسلہ مانہ بھارتی فوج نے شمالی کمانڈ مانہ 550 اسمی مشین پستول شامل کر لی ہیں۔ واضع رہے جسے یہ ہتھیار فوج غا کرنل پرساد بنسور غی طرفوں دفاعی تحقیق غی ترقی با رے تنظیم ڈی آر ڈی او

غی مدد نال حیدر آباد مانہ تیار کیا گیا ہیں۔ بھارت ہی مانہ تیار کیا گیا یہ ہتھیا ر بھارتی فوج غا اتم نربھر بھارت غا عظم نانہ ظاہر کریں۔

\*\*\*\*\*

## NITI Aayog Jal Utsav

نیتی آیوگ نے اج تیں 15 تہاڑاں توڑی جا ری رہن آلا جل اُتسو غی شروعات کی ہے جس غے تحت پانی انتظام، تحفظ تے پائیدار طریقہ نال اس غا استعمال با رے جانکا ری نانہ عام کرنو ہے۔ واضع رہ جے پانی غی جانکا ری نانہ عام کرن با رے یاہ مہم وزیر اعظم نریندر مو دی غا اُس نظریہ ور چل غے چلائی جا رہی ہے جس مانہ گذشتہ سال گا دسمبر مہینہ مانہ جل اُتسو غے متعلق بلائی گئی چیف سیکریٹریاں غی تیجی کا نفرنس غی سربراہی غے دوران وزیر اعظم نے جل اُتسو غو نظریو ظاہر کیو تھو۔ اس سلسلہ مانہ نیتی آیوگ غو کہنو ہے جے جل اُتسو غی اس مہم نانہ آئندہ 6 توں 24 نومبر نانہ چُنیا گیا 20 ضلعان تے بلاکاں مانہ عمالیو جا ئے گو۔ واضع رہ جے اس مہم نانہ جل جیون مشن تے جل شکتی با رے وزارت غا اشتراک نال عمالیو جا رہیو ہے۔

\*\*\*\*\*

## Parliament Winter Session

پارلیمنٹ غو سرمائی اجلاس آئندہ 25 نومبر تیں شروع ہو رہیو ہے جہڑو جے 20 دسمبر توڑی جا ری رہ گو۔ اس سلسلہ مانہ پارلیمنٹی معاملان غا وزیر کرن رجیو نے سماجی میڈیا ور اک پوسٹ سانجی کرتاں واں جانکا ری دتی ہے جے 26 نومبر نانہ بھارتی آئین غی 75 ویں برسی منان غا سلسلہ مانہ سمویدان سدھن غا مرکزی حال مانہ اک خصوصی تقریب منعقد کی جا ئے گی۔

\*\*\*\*\*

## Railways

چھٹھ تہوار غا موقعہ ور ریلویز غی طرفوں ریل مسافراں غی سہولت با رے خصوصی ریل گڈیں چلائی گئی ہیں۔ کل تقریباً 25 تہوار خصوصی ریل گڈی دہلی این سی آر تیں مُلک غا مشرقی علاقان در روانہ ہو ئیں۔ آکاشوانی سنگ خصوصی طور ور بات چیت کرتاں واں شمالی ریلوے غا چیف عوامی رابطہ افسر ہمانشو شیکھر اُپادئے نے کہیو ہے جے جنرل کلاس مانہ سفر کرن آلا مسافراں غی سہولت با رے خصوصی مانگ ور شمالی ریلوے غی طرفوں یہ ریل گڈیں چلائی گئی ہیں۔ اس سال تہواری موسم غے دوران مسافراں غی پیہڑ نانہ دیکھتاں واں بھارتیہ ریلوے غی طرفوں پہلی اکتوبر تیں اس مہینہ غی 30 تا ریخ تک تقریباً 7 ہزار خصوصی ریل گڈیں چلائی ہیں تے روزانہ تقریباً 2 لکھ اضافی مسافر ان خصوصی ریل گڈیاں غے ذریعے سفر کر سکیں۔ ہجوم نانہ کنٹرول کرن تے آسان و بہتر سفر با رے حفاظتی اقدامات وی کیا گیا واہ ہیں۔

\*\*\*\*\*

## Street Play Udhampur

گو رنمنٹ میڈیکل کالج اُدھم پور غا طالب علماں غی طرفوں گول مارکیٹ روٹری مانہ اک متاثر کن ٹکٹ ناٹک پیش کیو گیو۔ جس مانہ عام آدمیاں تے بالخصوص نوجوانان نانہ تمباکو غا استعمال غے خلاف بیدار کیو گیو۔ یوہ پروگرام سی ایم او اُدھم پور ڈاکٹر انیل منہاس غی سربراہی مانہ منعقد ہوؤ۔ جس مانہ کا فی تعداد مانہ لوک شامل ہوا۔ جنہاں نے طبی طالب علماں غا اس بیداری قدم نانہ سراہیو۔

\*\*\*\*\*

یہ خبر تم آکاشوانی تم آکاشوانی جموں تیں سُن رہیا ہیں خبراں غا باقی حصہ نال آصف لو دہی۔

## US Prez-Result

امریکہ غا صدارتی چناؤ مانہ ڈونالڈ ٹرمپ نے فیصلہ کن جیت درج کرن غے نیڑے پُچ گیا ہیں۔ واضع رہ جے ڈونالڈ ٹرمپ غے مدِ مقابل ڈیموکریٹک اُمید وار کمالا ہیرس چناؤ لڑ رہی ہیں۔ چناؤ غا بکھ بکھ ریا ستاں تیں بلیں بلیں نتائج باندے آن ور ریپبلکن پا رٹی غا اُمیدوار ڈونالڈ ٹرمپ غا حمایتیاں نے اُن نانہ مبا رکباد دینی شروع کر دتی ہے۔ تے ٹرمپ نے پالم بیچ مانہ اپنا حمایتیاں غی اک بڑی بھیڑ سنگ خطاب کیو ہے۔ واضع رہ جے چناوی میدان غی اس دور مانہ ڈونالڈ ٹرمپ 270 ووٹ حاصل کرن غے نیڑے پُچ گیا ہیں۔ اواں اُن غی مدِ مقابل ڈیمو کریٹک اُمید وار کمالا ہیرس نے ہوارڈ یونیورسٹی مانہ خطاب کرن با رے اپنو پروگرام ملتوی کر دتو ہے۔ ذریعاں نے دسیو ہے جے کمالا ہیرس نے نیو ہمی سفیر تے ویر جینہ سمیت گُجھ دوجی ریا ستاں مانہ جت درج کی ہے ور ڈونالڈ ٹرمپ غی کامیابی باندے نظر آرہی ہے۔ اُمید کی جا رہی ہے ڈونالڈ ٹرمپ ہُن امریکہ مانہ نوی تبدیلی لیان آلے پا سے کم کریں گا۔

\*\*\*\*\*

## PM Trump

وزیر اعظم جناب نریندر مودی نے امریکہ مانہ ہوئی صدارتی انتخابات مانہ جیت در اگے بدھتا ڈونالڈ ٹرمپ مانہ مبا رکباد دتی ہے۔ اک سماجی ذرائع ابلاغ پوسٹ مانہ جناب مو دی نے کہیو ہے جے ڈونالڈ ٹرنپ اپنا پہلا دور صدارت غی کامیابیاں غی بنیا د ور ہی دوبا رہ جیت در اگے نظر آرہیا ہیں۔ جناب مو دی نے کہیو ہے جے ہُن وے بھارت امریکہ مربوط عالمی حکمت عملی حصے داری نانہ مزید مضبوط کرن با رے از سر نو تعاون غا متمنی ہیں۔ وزیر اعظم نے مبارکبا پیش کرتاں واں جناب ٹرمپ مانہ کہیو جے بھارت اور امریکہ دوئے مل غے کم کرتاں واں بھارت اور امریکہ غا لوکاں غی بہتری نانہ یقینی بناتاں واں عالمی امن پا ئیداری تے خوشحالی نانہ بادو دینگا۔

\*\*\*\*\*

## SAR

جموں کشمیر حکومت غی طرفوں جولائی تیں ستمبر 2024 آلی تیجی سہ ماہی آلی ملازمین کارکر دگی نگرانی نظام یعنی ای پی ایم غے تحت اپنی جائز رپورٹ پھرن غی آخری تاریخ نانہ بدھا دتو ہے۔ اکتوبر مہینہ غا پہلا ہفتہ آلی تا ریخ نانہ ہون بدھا غے ملازمین غی بہت ساری گذارشات ور یاہ تا ریخ 15 نومبر 2024 تک بدھا دتی گئی ہے۔ اس رپورٹ ور رپو رٹینگ افسر غی طرفوں اگے جائزہ غی تاریخ نانہ وی بدھا غے 25 نومبر 2024 کیو گیو ہے۔ حکومت غا عام انتظامیہ محکمہ غاکشنر سیکریٹری سنجیو ورما غی طرفوں جا ری سرکولر مانہ کہیو گیو ہے جے جھیڑا ملازم یہ رپورٹ اکتوبر مہینہ غا اخیر تک نہیں پھر سکیا اُن واسطے یاہ رپورٹ سونپن غی تا ریخ 15 نومبر 2024 تک بدھا دتی گئی ہے۔ واضع رہ جے انتظامی محکماں غی طرفوں ای پی ایم ور ملازمین غی طرفوں سہ ماہی رپورٹاں نانہ پھرن ور لگاتار نگرانی رکھی جائے۔

\*\*\*\*\*

## Reasi SBI

بھارتیہ سٹیٹ بینک دیہی خود روزگاری تربیتی اداری ایس بی آئی رسیٹی غا تعاون سنگ کمپیوٹرازڈ آکا وٹنینگ با رے تربیتی پروگرام اج اختتام پزیر ہو گیو ہے۔ ماہور، سو چندھار، چسانہ تے تھورو علاقہ تیں بسنیک تقریباً 30 نوجواناں نے اس 30 دن تک چلن آلا تربیتی پروگرام مانہ شرکت کی تے تجارت غا ہنراں با رے سکھیو۔

\*\*\*\*\*

## Farmers Doda

ڈپٹی کمشنر ڈوڈہ ہر ویندر سنگھ غی طرفوں 25 کساناں غا اک گروپ نانہ ہری جھنڈی دس غے تربیت و تجربہ بارے سرینگر غا دورہ واسطے روانہ کیو ہے۔ جس غو مقصد مقامی کساناں نانہ باختیار بنان بارے اک پہل ہے۔ اس کساناں سیر غو اہتمام ذریعہ خود کار سازی سب مشن یعنی ”سیم“ تے ذریعہ ٹیکنالوجی انتظامی ایجنسی ”آتما“ پروگراماں غے تحت محکمہ باغبانی غی طرفوں کیو گیو ہے، جس غو مقصد کساناں نانہ باغبانی بارے جدید ہنر تے پائیدار ذراعت بارے واقف کرانویں۔ اس روانگی تقریب غے دوران ڈپٹی کمشنر ڈوڈہ نے کساناں ور زور دتو جے وے جدید طریقہ کاشت سنگ کھیتی باڑی مانہ جدت لیاویں تے پیداوری کاشت نانہ بدھاتاں واں ذریعہ سیکٹر مانہ پائیدار مستقبل نانہ یقینی بناوے۔

\*\*\*\*\*

## Poonch Link Up Day

پونچھ ضلع مانہ اج بھارتی فوج نے ضلع غا نوجواناں غی صلاحیتاں نانہ باندے لیاں گا سلسلہ مانہ بکھ بکھ مقابلوں غو انعقاد کیو۔ جس مانہ ضلع غا بکھ بکھ تعلیمی اداراں غا طالب علماں نے حصو لیا۔ اس دوران گان بجان غے علاوہ بحث مباحثہ بارے وی مقابلہ منعقد کیا گیا۔ واضع رہے جے ان مقابلوں غی خاطر چنیا گیا طالب علماں غا نایاں غو اعلان 22 نومبر نانہ پونچھ لینک اپ ڈے غا موقعہ ور بولتاں واں سنگیتا شرما نامی اک طالبہ نے کہیو جے پونچھ جیسا دور دراز ضلع مانہ بھارتی فوج ہم نانہ بہترین موقعو فراہم کر رہی ہے۔

\*\*\*\*\*

## JK H-ME

جموں کشمیر حکومت نے صحت تے طبی تعلیم محکمہ مانہ اک خصوصی ڈائریکٹوریٹ قائم کرن بارے منظوری دتی ہے۔ واجہ رہے جے اس سلسلہ مانہ حال ہی مانہ اک حکم نامو وی جاری کیو گیو تھو جس نانہ علمایا جان نال جموں کشمیر مانہ صحت خدمات مانہ متی بہتری آئی جاسکے۔

\*\*\*\*\*

اس غے نال ہی خبراں غو یوہ بلیٹن ختم ہوؤ۔